

ՑՈԼԱԿ ՄԱԼԽԱՍՅԱՆ

ՀԱՅԱՍՏԱՆԻ ԵՎ ՖՐԱՆՍԻԱՅԻ ՊԵՏԱԿԱՆ ԿԱՌՈՒՅՑՆԵՐԻ ՓՈԽՀԱՐԱՔԵՐՈՒԹՅՈՒՆՆԵՐԸ ՄԻՋՊԵՏԱԿԱՆ ՀԱՍՆԱԳՈՐԾԱԿՑՈՒԹՅԱՆ ԶԱՐԳԱՑՄԱՆ ՀԱՄԱՏԵՔՍՈՒՄ

Նորանկախ Հայաստանի արտաքին քաղաքականության կենտրոնում ի սկզբանե եղել է Ֆրանսիայի հետ բազմակողմ հարաբերությունների զարգացումը: Դա ուներ հիմնավորված պատճառներ, որոնցից պետք է առանձնացնել խոր արմատներ ունեցող հայ-ֆրանսիական պատմամշակութային առնչությունները և Ֆրանսիայում մեծ ու ազդեցիկ համայնքի առկայությունը: Ոչ պակաս կարևոր էր այն, որ Հայաստանի Հանրապետության պետական կառավարման համակարգը հնարավորինս մերձեցվել էր ֆրանսիական մոդելին:

Հարաբերություններ բարձրագույն մակարդակով

Հայաստանի և Ֆրանսիայի նախագահների հանդիպումների ժամանակ երկուստեք առանձնահատուկ կարևորություն է տրվել Հայաստանի օրենսդրական դաշտի ձևավորմանն ու զարգացմանը: Հայ-ֆրանսիական բազմակողմ հարաբերությունների զարգացման համար կարևոր խթան է հանդիսացել երկու երկրների նախագահների բարձր մակարդակով հանդիպումները: 1993թ. մարտի 12-ին ՀՀ նախագահ Լևոն Տեր-Պետրոսյանի և Ֆրանսիայի նախագահ Ֆրանսուա Միտերանի միջև Փարիզում տեղի ունեցած բանակցությունների արդյունքում ստորագրվեց «Հայաստանի Հանրապետության և Ֆրանսիական Հանրապետության միջև փոխըմբռնման, բարեկամության և համագործակցության մասին» միջպետական պայմանագիրը¹, որն ուրվագծում էր երկու երկրների միջև հետագա համագործակցության հնարավոր ոլորտները:

¹ «Հայաստանի Հանրապետություն», 16 մարտ, 1993թ., ք. 2-3:

1996թ. հունիսի 11-13-ը Լևոն Տեր-Պետրոսյանի Ֆրանսիա կատարած պաշտոնական այցելության ժամանակ², տեղի ունեցան նրա հանդիպումները նախագահի ժակ Շիրակի, վարչապետ Ալեն ժյուպեի և պաշտոնատար այլ անձանց հետ: Այցի ընթացքում կնքվեց «Եկամուտների ու գույքի կրկնակի հարկումը բացառելու և հարկումից խուսափումը կանխելու վերաբերյալ» պայմանագիրը, որի նպատակն էր խթանել ապրանքաշրջանառությունը երկու երկրների միջև, ինչպես նաև ստորագրվեց էներգետիկայի ոլորտում հայ-ֆրանսիական համագործակցության վերաբերյալ հուշագիրը³, որը դարձավ էներգահամակարգի բնագավառում երկկողմ միջգերատեսչական հարաբերությունների հիմքը:

Ֆրանսիայի հետ Հայաստանի տարբեր մակարդակներով միջպետական համագործակցությունը նոր փուլ թևակոխեց 2000-2001թթ. ընթացքում: ՀՀ նախագահի Ռոբերտ Քոչարյանը 2000թ. հունիսի 30-ից հուլիսի 2-ը և 2001թ. հունվարի 25-26-ը աշխատանքային այցեր կատարեց Ֆրանսիա և բանակցություններ վարեց հայ-ֆրանսիական հարաբերությունների գերակա ուղղությունների պետական հովանավորության և դրանց խոչընդոտող արգելքների հաղթահարման նպատակով:

2001թ. փետրվարի 12-14-ը ՀՀ նախագահ Ռ. Քոչարյանը պետական այց կատարեց Ֆրանսիա: Այցի ընթացքում Ֆրանսիայի նախագահ ժ. Շիրակի հետ քննարկվեցին Կովկասի խաղաղության ու կայունության, երկու երկրների միջև տնտեսական, քաղաքական, մշակութային և ռազմական համագործակցության հարցերը:

Միջխորհրդարանական կապեր

Հայ-ֆրանսիական միջխորհրդարանական կապերը պաշտոնական բնույթ ստացան Հայաստանի Հանրապետության Գերագույն խորհրդի 1990թ. ընտրություններից հետո:

1990թ. սեպտեմբերին Ֆրանսիայի Ազգային ժողովում ստեղծվեց Ֆրանսիա-Հայաստան պատգամավորական խումբ, որը նպատակ ուներ

² «France Armenie», Juin, 1996, p. 2

³ ՀՀ ԱԳՆ-ի ընթացիկ արխիվ. «Հայ-ֆրանսիական փոխհարաբերություններ» թղթապահակ, ք. 27

ուսումնասիրել երկկողմ հարաբերությունների զարգացման հնարավորությունները⁴։ Խմբի անդամները հիմնականում Ֆրանսիայի հայաշատ շրջաններից ընտրված պատգամավորներ էին։ 1992թ. հոկտեմբերին տեղի ունեցավ ՀՀ ԳԽ նախագահ Բ. Արաքցյանի պաշտոնական այցելությունը Ֆրանսիա, որի ժամանակ երկու երկրների խորհրդարաններում ստեղծվեցին բարեկամության խմբեր։ Ֆրանսիայի Ազգային ժողովում այդ խմբի ղեկավարն էր Ֆրանսուա Ռոշբլուանը, Հայաստանի Գերագույն Խորհրդում Հենրիկ Իգիթյանը։ 1994թ. սեպտեմբերին Ֆրանսիայի Ազգային ժողովի պատվիրակությունը Ֆ. Ռոշբլուանի գլխավորությամբ այցելեց Հայաստան, իսկ 1995թ. մարտի 9-ին Հայաստանի ԳԽ պատվիրակությունը փոխադարձ այց կատարեց Ֆրանսիա⁵։ Հանդիպումների ու բանակցությունների արդյունքում ՀՀ Գերագույն Խորհրդի և Ֆրանսիայի Հանրապետության Ազգային ժողովի միջև կնքվեց համագործակցության համաձայնագիր ու կողմերը ձեռք բերեցին հետևյալ պայմանավորվածությունները.

- Ընդլայնել համագործակցությունը երկու երկրների խորհրդարաններում ստեղծված բարեկամության խմբերի միջև, բարձրացնել նրանց դերը միջխորհրդարանական գործնական հարաբերությունների ապահովման համար
- Միջխորհրդարանական համագործակցությունը ամրապնդել պատգամավորների ու պաշտոնյաների փոխադարձ այցերով, երկու երկրների խորհրդարաններին անհրաժեշտ հրապարակումների ու տեղեկատվության փոխանակմամբ
- Ֆրանսիայի Ազգային ժողովը պարտավորվեց ցույց տալ տեխնիկական օգնություն ՀՀ Գերագույն Խորհրդին և նրա պաշտոնյաների համար կազմակերպել վերապատրաստման դասընթացներ ՀՀ ԳԽ-ի պաշտոնյաների համար⁶

1996թ. մայիսին Շառլ Ազնավուրի ուղեկցությամբ (որը ՀՀ հատուկ հանձնարարություններով դեսպանն է Ֆրանսիայում) Հայաստան այցելեց

⁴ «Հայաստանի Հանրապետություն», 25 փետրվար, 1992թ., ք. 2:

⁵ «Ազգ», 10 մարտ, 1995թ., ք. 2-3:

⁶ ՀՀ ԱԳՆ-ի ընթացիկ արխիվ. «Հայ-Ֆրանսիական պայմանագրեր» թղթապանակ, ք. 10:

Ֆրանսիայի Սենատի նախագահ Ռընե Սոնորին, որը հանդիպեց ՀՀ Աժ նախագահի հետ և ելույթ ունեցավ ՀՀ Ազգային ժողովում:

Երկու երկրների օրենսդիր մարմինների ակտիվ և արդյունավետ գործակցության հիմքում, անկասկած, ընկած էր երկու ժողովուրդների հոգեհարազատության գործոնը, որը, պատմականորեն ծանր փորձությունների ենթարկվելով, ավելի բյուրեղացավ Հայաստանի անկախության տարիներին: Հարկ է նաև նշել, որ Ֆրանսիայում օրենսդիր մարմինների ընտրություններում հայ համայնքը մշտապես ի գործու է եղել իր արդար պահանջները լսելի դարձնել ֆրանսիական իշխանություններին, ինչն, իր հերթին, երկու երկրների խորհրդարանների առջև ծառացած մի շարք խնդիրների լուծման համար ստեղծել է փոխադարձ ընկալելի մթնոլորտ:

1997թ. մայիսին Ֆրանսիայում արտահերթ խորհրդարանական ընտրություններում հաղթեցին ձախ ուժերը և ձևավորվեց հայ-ֆրանսիական բարեկամության նոր խումբ՝ սոցիալիստ ժան Պոլ Բրետի գլխավորությամբ⁷: Այդ խումբը ծավալուն աշխատանքներ է տարել հայոց ցեղասպանության ճանաչման վերաբերյալ օրինագիծը Ֆրանսիայի Ազգային ժողովում քննարկման դնելու ուղղությամբ ու նրա ջանքերի շնորհիվ էր նաև, որ 1998թ. մայիսի 29-ին ընդունվեց օրենք հայոց ցեղասպանության ճանաչման վերաբերյալ⁸:

Ակտիվ ու արդյունավետ շփումներ են եղել նաև Ֆրանսիայի Սենատի անդամների հետ, որի ապացույցն են հաճախակի փոխայցելությունները: Այսպես, 1998թ. հունիսի 22-29-ը Հայաստանում էր գտնվում Ֆրանսիայի Սենատի պատվիրակությունը՝ սենատի հայ-ֆրանսիական խմբի ղեկավար սենատոր Ժակ Ուդենի գլխավորությամբ: Պատվիրակությանն ուղեկցում էր ֆրանսիացի գործարարների մի խումբ, որի նպատակն էր ուսումնասիրել Հայաստանի հետ տնտեսական համագործակցության հնարավոր ոլորտները⁹:

1999թ. մարտի 30-ից ապրիլի 4-ը ՀՀ Աժ պատվիրակությունը նախագահ Խ. Հարությունյանի գլխավորությամբ այցելելով Ֆրանսիա հանդիպումներ է

⁷ "France Armenie", Mai, 1997, p. 2.

⁸ Լ.Ա.Բարսեղյան, «Ֆրանսիան հրապարակայնորեն ճանաչում է հայոց ցեղասպանությունը», Երևան, 1998թ., ք.3:

⁹ «Հայաստանի Հանրապետություն», 30 հունիս, 1998թ., ք. 1-2:

ունեցել Սենատի նախագահ Զ. Պոնսլեի և Ֆրանսիայի ԱԺ նախագահ Լ. Ֆաբյուսի հետ: Հանդիպումների ժամանակ քննարկվել են տարածաշրջանի քաղաքական կայունության և հակամարտությունների՝ խաղաղ ճանապարհով կարգավորման հարցերը:

Ֆրանսիայի Սենատի պատվիրակությունը նախագահ Զ. Պոնսլեի գլխավորությամբ հարավկովկասյան երկրներ այցի շրջանակներում 1999թ. հուլիսի 20-ին ժամանեց Հայաստան, ուր պայմանավորվածություն ձեռք բերվեց մշակել երկարաժամկետ ծրագիր Ֆրանսիայի Սենատի և ՀՀ Ազգային ժողովի միջև: Հանդիպումների արդյունքում որոշվեց Անդրկովկասի երեք պետությունների խորհրդարանների նախագահների և Ֆրանսիայի Սենատի նախագահի միջև պարբերական հանդիպումներ անց կացնել, որը և սկզբնավորվեց 1999թ. դեկտեմբերի 15-ին:

Ֆրանսիայի Սենատը 2000թ. նոյեմբերի 8-ին (2000թ. փետրվարի 2-ի և մարտի 24-ի երկու մերժումից հետո) քննարկման դրեց և քվեարկությամբ ընդունեց հայոց ցեղասպանության ճանաչման վերաբերյալ օրենքի նախագիծը, որը Ֆրանսիական ժողովրդավարական ոգու և պատմական ճշմարտության անկողմնակալ գնահատման աներկբա դրսևորումներից էր¹⁰:

Միջկառավարական համագործակցությունը

Ֆրանսիայի հետ երկկողմ կառավարական հարաբերությունները ձևավորվել են ՀՀ կազմավորումից ի վեր և զարգացել են միջպետական համագործակցության ընդլայնմանը համահունչ: Այսպես, դեռ 1992թ. ապրիլին պաշտոնական այցով Ֆրանսիա է մեկնել ՀՀ փոխնախագահ, վարչապետ Գ. Հարությունյանը, որը և հանդիպումներ է ունեցել Ֆրանսիայի նախագահի, վարչապետի, մի շարք նախարարների հետ: Այդ ընթացքում Ֆրանսիական պաշտոնական շրջանակները պատրաստակամություն են հայտնել օժանդակել ՀՀ պետության ամրապնդմանը: Հանդիպումների ժամանակ քննարկվեցին նաև կոնկրետ ոլորտներում համագործակցության հնարավորությունները:

Այդ այցին հաջորդել են ՀՀ կառավարական պաշտոնյաների նոր այցելությունները Ֆրանսիա, որոնց արդյունքում քննարկվել են Ֆրանսա-

¹⁰ Լ.Ա.Բարսեղյան, «Ֆրանսիան հրապարակայնորեն ճանաչում է հայոց ցեղասպանությունը», Երևան, 1998թ., ք.10:

հայերի մասնակցությամբ ֆրանսիական Բուշ-դյու-Ռոն դեպարտամենտի կողմից Հայաստանին գործում աջակցություն ցույց տալու, Սեծամորի ատոմակայանի վերագործարկմանը աջակցելու խնդիրները:

1997թ. դեկտեմբերի 7-11-ը Ֆրանսիա պաշտոնական այց կատարեց ՀՀ վարչապետ Ռ. Քոչարյանը: Կայացած հանդիպումների ժամանակ նա ներկայացրել է Հայաստանի դիրքորոշումը ինչպես ԼՂ հակամարտության կարգավորման, այնպես էլ տարածաշրջանային անվտանգության ու քաղաքական կայունության հարցերի վերաբերյալ: Հիմնական շեշտադրումները վերաբերվել են ֆրանսիական մասնավոր կապիտալի Հայաստան մուտքին, և հայաստանյան ապրանքների Ֆրանսիա արտահանման ծավալների ընդլայնմանը:

Հայ-ֆրանսիական պետական կառավարման համակարգերի հարաբերությունները զարգացել են նաև համապատասխան գերատեսչությունների գործակցության շրջանակում:

Ներքին գործեր և պաշտպանություն

Իրավապահ մարմինների մակարդակով հայ-ֆրանսիական հարաբերությունները ի սկզբանե նպատակաուղղվել են հանցավորության դեմ պայքարի արդյունավետ կազմակերպմանը: Այդ ուղղությամբ 1995թ. մարտի 22-ին երկու երկրների ներքին գործերի նախարարությունների միջև ստորագրվել է համաձայնագիր «Ներքին անվտանգության ոլորտում համագործակցության մասին»¹¹: Այս համատեքստում շփումներն ընդգրկել են այնպիսի ոլորտներ, ինչպիսիք են պայքարը ահաբեկչության, թմրամիջոցների ապօրինի շրջանառության, դրամանենգության դեմ և այլն: Այդ ուղղություններով փորձի փոխանակման և վերապատրաստման կարգով տարբեր ժամանակներում կազմակերպվել են փորձագետների փոխայցեր:

Հայաստանի և Ֆրանսիայի պաշտպանական կառույցների միջև հարաբերությունները դեռևս չեն անցել ռազմաուսումնական համագործակցության մակարդակից: Ենթադրաբար ֆրանսիական կողմի համար Հայաստանի հետ պաշտպանական գործակցության խորացման խոչընդոտ է հանդիսացել ԼՂ հակամարտության լուծման գործում Ֆրանսիայի միջնոր-

¹¹ ՀՀ ԱԳՆ-ի ընթ. արխիվ. «Հայ-ֆրանսիական պայմանագրեր» թղթ., թ. 12

դական առաքելությունից բխող ռազմական կապերի ոլորտում չեզոքություն պահպանելու հրամայականը:

Առողջապահություն և բնապահպանություն

ՀՀ և Ֆրանսիայի միջև սերտ համագործակցություն է ծավալվել առողջապահության բնագավառում: Մասնավորապես, Երևանի և Մարսելի բժշկական համալսարանների միջև իրագործվել է ուսանողների փոխանակություն, կազմակերպվել են համատեղ գիտական աշխատանքներ ու սեմինարներ¹²:

«Հանրային օգնություն – Փարիզի հիվանդանոցներ» կազմակերպության հետ պայմանավորվածություն է ծեռք բերվել համատեղ ջանքերով իրականացնել հայ և ֆրանսիացի բժիշկների վերապատրաստման դասընթաց-ներ: Բացի այդ, միջհիվանդանոցային համագործակցության ծրագրեր են իրականացվել Երևանի Միքայելյանի անվան վիրաբուժության ինստիտուտի ու Փարիզի «Բոժոն» հիվանդանոցի միջև, ինչպես նաև Երևանի հանրապետական մանկական հիվանդանոցի և Ֆրանսիայի Էքս-Ան-Պրովանս քաղաքի հիվանդանոցի միջև¹³:

ՀՀ Առողջապահության նախարարությունը ակտիվ համագործակցել է Ֆրանսիայի Հայ բժիշկների միության (UMAF) ու նրա Փարիզի և Ռոն-Ալպի մասնաճյուղերի հետ¹⁴: Միությունը մեծ արդյունավետությամբ է գործել հատկապես 1988թ. Երկրաշարժից հետո՝ տասնյակ խմբեր ուղարկելով աղետի գոտի, մեծաքանակ դեղորայք և բժշկական սարքավորումներ առաքելով Հայաստանի և Լեռնային Ղարաբաղի հիվանդանոցներին: Ֆրանսահայ բժիշկների միության ջանքերով ժամանակակից բժշկական սարքավորումներով են ապահովվել Էրեբունու և Միքայելյանի անվան հիվանդանոցները: UMAF-ի Ռոն-Ալպի մասնաճյուղի ֆինանսավորմամբ Աբովյանում տեխնիկապես հագեցվել է բժշկական լուծույթների արտադրման գործարանը, ինչպես նաև կազմակերպությունը ֆինանսական աջակցություն է ցուցաբերել

¹² ՀՀ ԱԳՆ-ի ընթացիկ արխիվ, «Հայ-ֆրանսիական փոխհարաբերություններ» թղթապանակ, ք. 17:

¹³ Նույն տեղում, ք. 17:

¹⁴ ՀՀ ՆՊԿՊԱ, ֆ. 391, ց. 9, գ. 148, ք. 2-3:

«Էրեբունի» հիվանդանոցում ստոմատոլոգիական կենտրոնի բացմանը¹⁵: Բացի այդ մեծ թվով հայ բժիշկներ վերապատրաստման դասընթացներ են անցել Ֆրանսիայում:

ՀՀ Առողջապահության նախարարությունը համագործակցել է նաև Մարսել քաղաքի «Ազատագրություն» կազմակերպության հետ, որի արդյունքում իրականացվել է հայ հիվանդ երեխաների Ֆրանսիայում բուժելու «Հուլիսի շղթա» ծրագիրը¹⁶: Վերոնշյալ կազմակերպության հետ համագործակցության արդյունքում վերակառուցվել է Երևանի Պետական բժշկական համալսարանին կից գործող ատամնատեխնիկական դպրոցը:

Բնապահպանության բնագավառում հայ-ֆրանսիական միջպետական համագործակցության ուղղությամբ առաջին քայլն արվել է 1999թ., երբ Ֆրանսիայի Բնության և Շրջակա միջավայրի պահպանության ֆոնդը պաշտոնապես դիմել է ՀՀ բնապահպանության նախարարությանը առաջարկելով համատեղ իրականացնել «Հայաստանի անտառների վերականգնում» ծրագիրը, իսկ հայկական կողմը հայտնել է իր հավանությունն ու անվերապահ աջակցությունը դրան: Նշված նախաձեռնության մանրամասների հստակեցումները շարունակվում են և զուգահեռաբար աշխատանքներ են տարվում բնապահպանության ոլորտում փոխգործակցության նոր եզրեր գտնելու համար:

Սահմանադրական դատարանների և արդարադատության մարմինների միջև կապեր

ՀՀ սահմանադրական դատարանի ստեղծման համար նախատիպ է ծառայել Ֆրանսիայի Սահմանադրական խորհուրդը: Հետևապես, այս երկու մարմինների միջև համագործակցությունը ի սկզբանե եղել է խիստ արդյունավետ: Արդեն 1997թ. հունիսի 12-17-ը ՀՀ սահմանադրական դատարանի պատվիրակությունը դատարանի նախագահ Գ. Հարությունյանի գլխավորությամբ պաշտոնական այց է կատարել Ֆրանսիա, որը կարևոր նշանակություն է ունեցել ֆրանսիական կողմի հարուստ փորձի ուսումնասիրման և ՀՀ

¹⁵ Նույն տեղում, ք.4-5:

¹⁶ ՀՀ ՆՊԿՊԱ, ֆ. 326, ց. 9, գ. 35, ք. 18:

սահմանադրական դատարանի պրակտիկ գործունեության մեջ ներառելու ուղղությամբ:

Տեղական մարմինների միջև համագործակցությունը

Հայ-ֆրանսիական տեղական մարմինների միջև համագործակցությունն առավել ցայտուն է դրսևորվել երկու երկրների տարբեր քաղաքների միջև պատմականորեն ձևավորված և մեր օրերում նոր լիցքով շարունակվող բարեկամական ու գործնական շփումներում: Այդ առումով հարկ է նշել Երևան ու Լիոն քաղաքների միջև սկիզբ առած համատեղ հետաքրքրությունների շրջանակներում գործնական կապերը: Տեղի են ունեցել Երևանի և Լիոնի քաղաքապետարանների տարբեր ոլորտների մասնագետների փոխայցելություններ, որոնց ընթացքում մշակվել են կոնկրետ ծրագրեր: Դրանցից արժանահիշատակ է Երևանի միասնական ինֆորմացիոն ցանցի ստեղծումն ու դրա արդյունավետ գործարկումը¹⁷:

Ավելի քան 15 տարվա պատմություն ունի Ալֆորվիլ և Աշտարակ քաղաքների միջև ծավալված համագործակցությունը: Դեռևս 1992թ. երկու քաղաքների միջև կնքվել է համագործակցության պայմանագիր, որից հետո նրանց պատվիրակությունները պարբերաբար հանդիպել են ու դրա արդյունքում իրականացրել տնտեսական, սոցիալական և մշակութային ոլորտներն ընդգրկող համատեղ ծրագրեր: Ալֆորվիլի քաղաքապետարանը մշտապես աջակցություն է ցուցաբերել Աշտարակ քաղաքին առողջապահության, տրանսպորտի, կոմունալ հարցերի սպասարկման խնդիրների լուծման բնագավառներում¹⁸:

1996թ.-ից արդյունավետ համագործակցություն է ծավալվել ՀՀ Լոռու և Ֆրանսիայի Պրովանս-Ալպ-Կոտ-Դ'Ազյուր մարզերի, ինչպես նաև Թալին և Վալանս քաղաքների միջև: Այն ընդգրկել է տարբեր բնագավառներ՝ կադրերի վերապատրաստում, էներգետիկա, մշակույթ, սոցիալական ոլորտ և շրջակա միջավայրի պաշտպանություն: 1999թ. ապրիլի 22-ին Պրովանս-Ալպ-Կոտ-Դ'Ազյուր մարզի ռեգիոնալ խորհրդի նիստի օրակարգային հարցերի թվում էր

¹⁷ Նույն տեղում, ք.22-23:

¹⁸ Նույն տեղում, ք. 24:

նաև 1915թ. Հայոց ցեղասպանության ճանաչման վերաբերյալ հիմնախնդիրը: Մարզխորհրդի նիստին մասնակցել և ելույթ են ունեցել Լուռու մարզպետարանի ներկայացուցիչները¹⁸: Սերտ կապեր են հաստատվել Ֆրանսիայի Հայ բժիշկների միության Մարսել քաղաքի համապատասխան բաժանմունքի ու Լումինիի ճարտարապետական բարձրագույն դպրոցի հետ:

Հիշարժան են Վանաձոր ու Ֆրանսիայի Բանյո, Ստեփանավան և Ֆրանսիայի Դեսին քաղաքների միջև ծավալված բարեկամական ու փոխադարձ օգնության վրա հիմնված հարաբերությունները: Համագործակցության շրջանակները լայն են եղել՝ ներառելով առողջապահական ու քաղաքաշինական ոլորտները, կրթությունը, գիտությունը, մշակույթը¹⁹:

Ընդհանրացնելով վերոշարադրյալը՝ կարելի է եզրակացնել, որ հայ-ֆրանսիական սերտ հարաբերությունների ընդհանուր համատեքստում իրենց արժանի տեղն են ունեցել երկու երկրների պետական կառույցների արդյունավետ և գործնական շփումները, որոնք, մեր խորին համոզմամբ, չեն սպառել զարգացման ներուժը և ապագայում դրանց էլ ավելի սերտ գործակցության ականատեսն ենք լինելու:

¹⁸ Ելույթ տեղում, ք. 23-24:

¹⁹ "France Armenie". Fevrier, 1999, p. 2-3.